

晉史略

六
五
册


九
二
册

第一册

史閣文庫	
書號	漢 9016
冊數	20 (1)
圖號	290 97

290-97





晉畧序目

自古帝王受命有天下雖德力殊軌未有不計功食報者也福過則倖禍必償之昔漢高祖無尺土之階崛起阡陌之中功成數稔衍祚四百斯不嗜殺人與秦楚易道之所致也及其末流黃巾俶攬董袁跋扈魏武艱難百戰僅乃克之德雖靡俾功亦偉矣文明相繼疆宇狃定司馬宣王升榻受遺任均骨肉主雖幼弱未聞否德也恩之弗圖唯闕竊是務父子兄弟異刃同割股肱遭其闕翦元首隨其移易假借威力劫制海內揆其功烈皆是邀利境外夸張揚詡之績非有算定區宇康濟民物之勤此豈足與魏武之勛業相次比哉且夫魏武延攬英雄識拔超軼委任授成殆無遺策此宐足以奔走一世者也司馬氏專行箝制迫脅之術乃亦舉世靡然迫乎太康遂壹區寓南東萬里書軌畢協統馭所屆反侈于

晉書卷之四
魏氏然後同氣搏噬非族偏處剝喪鏡削極乎無始始徼非常之
倖卒致非常之禍豈不哀哉向使泰始之初受寵若驚揆國重以
植綱紀別俗慝以培元氣庶幾哉逆取順守或可補救于萬一而
乃志畧侈于并吞情欲縱于得意其建官則大臣多而政柄襍其
封域則肩背鼓而心腹披其政體則寬積于上急積于下其風俗
則男秦聲譽婦耽逸游仰稽天心則無祖宗積案之報俯度地勢
則無秦漢金湯之固中察人事則無魯衛禮讓之俗維持不傾之
效泊乎南度寄命荆襄交廣資儲永絕方貢西藩北府漕戍不息
以區區之三吳供億萬乘民勞極矣然猶危而不亾歷而復起引
引延延百數十年是遵何道哉昔者三國鼎立英偉卓犖之士張
牙巖角奮其尺寸上之人取適時用棄捐科繩包瑕藏蕞唯恐有
所摧抑逮于有晉此風未艾是以一材一器之長靡弗効用詭譎

以爲智跌踢以爲辯飛揚跋扈以爲雄威能凌昔揜今照耀奕代
乃至遐陬殊俗之方椎墮剝剝之伍魁奇絕特蝟磔而起洪濤齧
山怪石出雷雨殷地芝菌生氣至物化莫知其然斯益大造之變
局非常情所可測已晉之立國崇長親親以八王之庸鴛方五胡
之桀黠聚優讓劣化機斯見是以朝權幻于獻蜃方鎮危于覆局
民力盡于錙銖人命輕于艸多運鍾石剝剝其然乎然而水火之
阨待拯飢渴之懷易副人窮反本事半功倍繭絲俗成士龍圖形
而配社芻牧是求丁劭移州而擊轂慘舒之氣居然相質則知禍
福徵召尠不由人景響相尋捷于枹燭局雖變而情則同固未可
謂造物之不仁民生之多辟也帝王之治民猶農夫之力穡民之
性情穡之根本利害中之慘于蝨蠶原夫漢季滔喪野清朝濁魏
氏尙通毀裂防維名教積而利權熾上下之交固以渙然離矣方

且采餽虛譽寄之隆棟陳畫餅以餽餒集蓉裳以禦冬晉乘斯覺
遂遷鼎器炊煬竈而直突踵覆車而縈策棄忽甫田驕莠之戒推
毀虎兕將出之柙辟猶縱齊斧以伐性養巨癰而待潰有識之士
惴焉黼展鼎鉉宴然靡警規爲措置務矜私智始則隕懿親以護
駭豎終則敵外戚而樹強宗兆爭唯恐其不工招釁唯恐其不速
夫何貽安之有哉一統者上聖之盛業也太平者至德之珍符也
焉有如此之根基如此之形勢如此之政俗而可以撫寧六合胙
之子孫者乎中興之難甚于繼體琅邪蒙立石之歲識適江表之
讐國奮弱力以雪積恥斯事體大容無責焉東北八州羈縻段邵
中都夾河飄搖李郭祖楫聽其自擊現哀告而不舉加以翼翼南
士則尊而弗親觥觥直言則斥而彌遠遂使門戶堅于盤石白望
重于顛俊內蒞植基固本之謀外成調停姑息之局太阿倒授沸

羹靡息劉石慕容苻姚之徒奮梟雄而恃險遠或借資于鬪矯或
假威于討逆朽木生蠹其是之謂歟盜亦有道視其所杖右侯頌
而世龍歆元恭在而宣武憂堅須白于景畧虎歎發于謝艾有由
然矣且夫克捷莫果于民志恢宏必因于資力民志不可以不素
定資力不可以不豫儲是以經緯上材必綢繆于農殖折衝妙策
先整齊于士氣自治之術強弱雖殊末之有改也而晉魚肉以虛
其內假借以驕其外昵衰佞以摧直榦慕雅遠以虧實用方欲驅
策疲氓力征經營天下豈所謂明分數識成敗者乎強而自治則
其強可久弱而自治則其弱漸強洛都不善用其強建康不善用
其弱來軫方適安得不取資龜鑑也昔在唐初羣籍繁備鈎稽蒐
討綽乎有裕而文皇手制意存曲藝諸臣承旨競采春華裁非一
手牴牾屢見恭讀

欽定四庫書目取備正史由于恤無因加討論究其翔實述本紀六篇表五篇列傳三十六篇國傳十一篇彙傳七篇序目一篇都六十六篇仁儉受直是用開闢作事謀始慎終盡美述武帝本紀第一外戚親藩倚重必危禍之本由宮闈述惠懷愍三帝本紀第二中興偏安以勞逸爲隆替英主不永年魁柄復棄述元明成三帝本紀第三主少國疑委重將相相弱將強幸乃不亾述康穆哀廢簡文五帝本紀第四將相和同雖否必通不明生疑乃遺厥難述孝武帝本紀第五國天民天食貧不和本先撥爲新主資不祀忽述安恭二帝本紀第六維天生才有才不才帝王御極俾得其職是以寧壹相彼不平分崩離析述甲子表第七地以山川隔風氣王者域之因其勢雖革必沿職方志述州郡表第八土宇分裂民生狹隘譬彼舟流莫知所屆述割據表第九下理務上丞弼

慎委任毋僭述執政表第十股肱弗衛腹心弊述方鎮表第十一禪代之世忠貞闖焉采彼葑菲以冠厥元述安平睢陵列傳第十二國有與立視其所以佞媚在廷雖泰必否述賈荀列傳第十三主好大臣喜功張厥外梏厥中述羊杜列傳第十四天府之雄注厝弗崇失肩背弗知以寒其躬述扶風列傳第十五任親爲治親賢乃忌弗克其私卒罔攸濟述齊王列傳第十六直言觥觥維國之楨悅而不懌奚貴錫朋述傅劉列傳第十七容身過頭曰有德家計之工國計之拙述山魏劉庾列傳第十八隙開乃塞塞必潰機危而觸觸必殆述臨晉二王太子列傳第十九中流得壺載浮載沈暫可支久弗任述張裴列傳第二十木蝨在內烈風在外何必齊斧然後摧碎述八王列傳第二十一版蕩識貞松柏後凋江河滔滔山岳弗搖述劉荊州列傳第二十二方嶽雖分師克在

和慨彼乖戾萎葉辭柯述劉王苟列傳第二十三斲芽再植難植
易拔銜石西山哀彼精衛述閻賈索麴列傳第二十四豈曰在遠
幸而獲濟實賴忠貞以紹其世述張涼州列傳第二十五國無常
形造形者誠兵無常勢作勢者氣不逢少康倡寡和遺黎屑屑淚
雨侈述祖豫州列傳第二十六止吳酷晉之施報以偏安乃其窳
不有君子誰汝毗述周顧列傳第二十七南方之強厥師老莊述
王丞相列傳第二十八南紀之重居上流卓哉勳名世罕儔述周
陶列傳第二十九始安術智高平德慧三吳之豪莫不慷慨日西
再中揮戈是賴述溫郗列傳第三十虛名可噉敦以矜豪白公怙
乳峻也魚哮不有良工六轡焉調述王蘇列傳第三十一身可戮
也不可辱也致命遂志不可奪也苟嘉其忠而昧其功是謂瞽矇
述郭譙周戴卞劉鍾桓列傳第三十二德足矜式才亦濟時或采

或榻大匠咸資述華陸褚孔列傳第三十三德優才弱而爲滕辭
雖奮百里終虞一蹶述庾何褚殷列傳第三十四知本知時明哲
庶幾述蔡王列傳第三十五任逢之流矜豪自奮平乘一嘆持矛
陷盾力小任重竟以顛隕永戒將來履滿息損述桓大司馬列傳
第三十六太原琅邪所出異門俱扶名義輝前裕昆述二王列傳
第三十七持危扶顛用彼相何以詠德曰克讓述謝桓列傳第三
十八出柙毀積將焉用彼任親在賢失不可悔述會稽列傳第三
十九吏治經術豈殊致勿爲墨守庶起廢述范徐列傳第四十親
外戚內呂禍息親內戚外桓禍亟禍發無門豈繫親戚述王兖州
列傳第四十一昏酣駮嬉屏粒而噉枯朽旣成爾拉爾摧吁嚙狂
且鼎竟移述桓楚列傳第四十二邪孰啓之俾耗三吳無罪無辜
淪胥以鋪述孫盧列傳第四十三桓桓干城白日青天過涉滅頂

亦無咎焉述毛何列傳第四十四覺肇爭雄禍鍾拔本厄運同遭
 萬夫所閔述劉馬列傳第四十五攀鱗附翼颺起雲涌立功前朝
 以受新寵述劉王沈朱列傳第四十六令狐為楊實維氏豪負固
 于邊不忘本朝述仇池列傳第四十七主弱客強流通為王恃險
 卒亾述成漢國傳第四十八才兼文武鬱不得吐乃激而儻復侯
 王之所述漢趙國傳第四十九勒唯眇眇虎尤不仁雄強相仍殄
 宗及羣述後趙國傳第五十霸假仁會有由厥宗多才媚嫉生尤
 述燕國傳第五十一健前驅登後勁王咸陽永固盛鑒禍盈可守
 勝述秦國傳第五十二詐開基文飾之謾無誠骨肉攜述後秦國
 傳第五十三棄忠就詐似智實愚後嗣顛覆垂之辜述後燕國傳
 第五十四衰姚棄壤竊以倔勢乘墟弗克乃伏于莽述西秦國傳
 第五十五親必噬狗之獠運會極鍾戾氣述夏國傳第五十六蠻

觸之爭不如弈碁誰能覆局軌寔是師述諸涼國傳第五十七不
 忘忠信中墜復起芟夷羣雄孰謂無以述魏國傳第五十八葛藟
 縣縣初縣終瘁本根既傷枝葉焉芘述宗室彙傳第五十九孝友
 忠義節烈與媿性情獨摯德不求備述篤行彙傳第六十不必有
 德聖訓昭一代風尚如蟠螭擇其善者使意消述清談彙傳第六
 十一全生生全亦各有道其癡中權妄者顰效述任達彙傳第六
 十二有民人焉是亦為政水深火熱得此為幸述良吏彙傳第六
 十三經尚調停史侈綴錄翰墨勳績弗驚寵辱述文學彙傳第六
 十四天地開泰彼寧自苦魚潛于淵冀免漑釜違親絕俗不遑宴
 處亦有中清式歌且舞述隱逸彙傳第六十五其文則史義各有
 取述序目第六十六編為十冊至于諸志杜馬善矣自揆舉羽之
 力恆懷絕曠之慮顧念始自弱冠即存斯志洎乎壯歲雖復酬酢

人事獨居深念未嘗去裏日月不居學殖弗益始衰之年忽焉已過釋今弗圖逝將靡及勉就剡彰其要害事即前史言成一家將以喻遠用匪侈博聞什七折衷依于涑水庶幾無悖資治之意云爾若夫搜覽叢殘掇拾遺佚以資攷證世有君子鄙人謝不敏焉

道光十八年戊戌十月朔荆谿周濟編次訖

晉畧第一冊

本紀一 武帝

本紀二 孝惠帝孝懷帝孝愍帝

本紀三 元帝明帝成帝

本紀四 康帝穆帝哀帝帝奕簡文帝

本紀五 孝武帝

本紀六 安帝恭帝

表一 甲子

第二冊

表二 州郡

第三冊

表三 割據

表四 執政

表五 方鎮

第四冊

列傳一 安平王孚王祥

列傳二 賈充石苞裴秀荀勗

列傳三 羊祜杜預王濬陶璜

列傳四 扶風王駿馬隆周處

列傳五 齊王攸王渾衛瓘和嶠

列傳六 二傳成二劉毅劉頌段灼

列傳七 山濤魏舒劉寔庾峻

第五冊

列傳八 楊駿汝南王亮楚王瑋愍懷太子遹

列傳九 張華裴頠

列傳十 八王趙王倫梁王彤淮南王允齊王冏成都王穎河間王顒長沙王乂東海王越 盧志

列傳十一 劉宏

列傳十二 劉琨王浚苟晞

列傳十三 閻鼎賈疋索綝麴允

列傳十四 八張軌寔茂駿重華曜靈 魏觀天錫

第六冊

列傳十五 祖逖劉遐李矩郭默劉允魏浚魏該

列傳十六 周玘顧榮紀瞻賀循熊遠

列傳十七 王導劉隗刁協

列傳十八 周訪陶侃應詹

列傳十九 溫嶠郗鑒毛寶王舒虞潭顧眾張闓

列傳二十 王敦蘇峻

列傳二十一 郭璞譙王承周顓戴淵卞壹羊曼劉超鍾雅桓

彝

列傳二十二 華恆二陸曄褚爽二孔愉丁潭陶同

第七冊

列傳二十三 三庾亮冰何充褚裒殷浩

列傳二十四 蔡謨王羲之孫綽

列傳二十五 桓溫

列傳二十六 王述王彪之

列傳二十七 二謝安桓沖

列傳二十八 會稽王道子王珣車允郗恢

列傳二十九 范甯徐邈

列傳三十 王恭劉牢之

列傳三十一 桓元

列傳三十二 孫恩盧循

列傳三十三 毛璩何無忌

列傳三十四 劉毅司馬休之

列傳三十五 劉穆之王鎮惡二沈林子二朱齡石

列傳三十六 仇池楊氏

第八冊

國傳一 成漢李氏

國傳二 漢趙劉氏

國傳三 後趙石氏

國傳四 燕慕容氏

國傳五 秦苻氏

第九冊

國傳六 後秦姚氏

國傳七 後燕慕容氏南燕慕容氏北燕馮氏

國傳八 西秦乞伏氏

國傳九 夏赫連氏

國傳十 涼呂氏南涼秃髮氏北涼沮渠氏西涼李氏

國傳十一 代魏拓跋氏

第十冊

彙傳一 宗室

彙傳二 篤行

彙傳三 清談

彙傳四 任達

彙傳五 良吏

彙傳六 文學

彙傳七 隱逸

序目

晉畧本紀一

武帝

帝諱炎字安世氏曰司馬楚漢時印為殷王都河內其後因居溫云八世至漢征西將軍鈞鈞生豫章太守量量生潁川太守儁儁生京兆尹防防子八人其第二子曰懿懿子九人長曰師次曰昭

懿妻張氏河內平皋人生三子師昭榦張有權畧魏武初辟懿辭以風痺天暴雨不覺自起收書家惟一婢見之張恐事泄手殺婢遂自執爨及懿寵柏夫人不禮張張嘗視懿疾懿曰老物可惜何煩出也張悲不食諸子亦不食懿乃謝之既而告人曰老物不足惜慮困我好兒耳魏正始八年五十九卒武帝受禪追尊曰宣穆皇后帝昭長子也懿字

仲達漢末為魏國太子中庶子魏武察其雄豪欲除之賴太子不以免文帝末以撫軍將軍錄尚書與曹真陳羣並受顧命明帝即位封舞陽侯遷驃騎將軍太和元年都督荆豫二州鎮宛平孟達四年遷大將軍加大都督假黃鉞與曹真伐蜀青龍四年遼東叛徵詣京師景初二年平遼東還至薊使者迎勞增封詔便道復鎮

關中至汲又詔赴都三日之間詔書五至懿疑京師有變乘追鋒車自白屋四百餘里一日夜而至明帝已大漸引升御牀執懿手目齊王芳曰以後事相託死乃復可忍吾忍死待君得相見無所復恨矣與大將軍曹爽並受遺詔輔幼主遷侍中都督中外錄尚書與爽對掌朝政爽忌之徙為太傅加殊禮入朝不趨贊拜不名劍履上殿為殊禮正始二年出拒吳遂留屯五年還朝八年偃疾不視事陰圖爽爽亦疑懿使其黨李勝候懿詐疾篤爽等信之不設備嘉平元年正月爽從魏帝謁陵弟羲訓典禁旅並委營以出懿立起奏太后廢爽兄弟奪其兵勒以迎帝誣爽反并其黨皆夷三族詔拜懿丞相奏事不名朝會不拜加九錫懿讓九錫偃疾不復朝每有大事天子就訪焉三年兗州刺史令狐愚太尉王凌謀討懿不克死之事連楚王彪懿并殺彪悉錄魏諸王公置鄴命有司監察不得與外人交

通詔拜相國封郡公又讓不受六月疾作王凌為崇八月卒年七十三葬河陰謚曰文宣晉受禪追尊曰宣皇帝廟號高祖墓曰高原陵師字子元以撫軍大將軍代懿輔政嘉平四年遷大將軍督中外錄尚書正光元年魏帝與中書令李豐后父光祿大夫張輯等謀以太常夏侯元代師師皆殺之遂廢帝而立高貴鄉公髦詔進師相國不受明年鎮東將軍毋丘儉揚州刺史文欽舉兵討師師自將攻殺儉欽奔吳欽子騫年十八勇冠三軍臨當引去以驍騎十餘陷陣所向皆披靡遂至師戲下師方割目上疣創未合驚而目出卒于許昌謚曰忠武晉受禪追尊曰景皇帝廟號世宗陵曰峻平師無子以昭子攸為子師初娶夏侯尚女其母魏公主也青龍二年為師所殺更娶吳質女又黜之更娶羊衛女武帝受禪尊為引訓太后羊以夏侯氏為言泰始二年尊夏侯氏為景懷皇后咸寧四年引訓太后崩謚景獻故昭遂代師輔政昭字子上儉欽之役以中領軍留鎮洛陽師疾篤昭往省拜衛將軍師卒魏帝詔

尚書傅嘏率六軍還京師而留昭鎮許昭不奉詔自率軍還進大將軍甘露元年加大都督封高都公加殊禮九錫不受二年五月鎮東大將軍諸葛誕起兵討昭昭挾天子笄奉太后圍壽春三年取之斬誕夷三族五月封晉公加九錫進位相國不受景元元年魏帝忿昭恣自率僮使六百人討之昭黨逆戰弒天子更立常道鄉公璜後更名曰奐更申前命不受四年大舉伐蜀捷書至乃受相國晉公九錫之命蜀降總百揆咸熙元年三月進爵爲王七月王奏司空荀顛定禮儀中護軍賈充正法律尚書僕射裴秀議官制太保鄭沖總而裁焉始建五等爵以中撫軍炎爲世子二年五月魏帝命王用天子禮樂妃曰后世子曰太子晉國置丞相以下官八月王薨謚曰文晉受禪追尊曰文皇帝廟號太祖墓曰崇陽陵晉王炎旣嗣位十一月魏帝使使奉冊禪位王讓羣臣固請閏十二

月十七日丙寅受禪僭皇帝大赦改元泰始

論曰史僭晉明帝時王導侍坐帝問前世所以得天下至高貴鄉公之事以面覆鉢曰若如公言晉祚安得長烏乎雖孝子慈孫百世不能改也封建旣壞帝王皆崛起積德索仁蓋靡得而稽焉唯夫平天下之大難拯黔黎于沈溺則天意人事翕然響臻其或遭時迫勢道出逆取餉以壇坫威以弧矢苟其所存者厚所樹者大則亦足以保世異哉司馬氏之有天下也無功窺竊三世相繼幸遂其欲適足以賈禍耳是以三綱淪斃九服摧頽朝靡十稔之安野空百室之聚專制僭逆之臣魚貫而乘勢扳附擁戴之徒茹連而俟時下至緇流妖誕么麼細瑣之輩苟其箝喙螫尾足以有所毒害莫不呀張趨舉倖而息逞豈悖逆之性固然哉氣類感而服習深非一朝一夕之故也故刪取舊文冠之武紀以著晉之禍敗

所由熾焉

泰始元年閏十二月

舊史改元之年即于歲首稱元年今皆以改元之月為斷

尊魏帝為陳留王追尊宣

景文三王皆為皇帝懲魏孤立大封同姓親屬王者二十七人佐命諸臣皆封公侯餘封賞各有差並置八公驃騎王沈車騎賈充中軍羊祜尚書令裴秀中書監荀勗侍中任愷常侍傅元皆為腹心充勸尤親幸用事改景初歷為泰始歷臘以酉社以丑除魏王公禁錮聽將吏終三年喪罷質任開言路

泰始二年正月有司議建七廟帝重其役不許即魏廟祭征西府君以下并景文凡七室實六世二月郊祀宣帝以配天宗祀文帝于明堂以配上帝始除五帝坐三月吳主孫皓使來弔祭有司奏為畚詔帝欲以謙和柔遠命書畚焉當是時北邊遼東西皆鮮卑句注之外河汾之間則匈奴北地上郡隴西則胡鮮卑氏羌皆保

塞襍居南邊廣陵淮南弋陽江夏襄陽巴蜀交州皆與吳接壤吳使還言晉新造易伐鄰好遂絕帝欲復三年喪羊祜謂傅元曰主上至孝雖奪其服實行喪禮若因此復先王之制不亦善乎元不可與諸臣固爭乃從漢魏權制既葬除服然帝猶深衣素冠降席徹膳終喪乃復吉五月王沈卒七月營太廟九月傅元皇甫陶上言汰冗食重農事有司奏寢之帝下詔切讓有司令元等更作條目主者八坐廣共精研十一月并園丘方丘于南北郊二至之祀合于二郊太廟成

泰始三年正月立子衷為皇太子三月令二千石得終三年喪司隸李惠劾故立進令劉友前尚書山濤等各占官田詔考竟友濤等勿問惠又劾騎都尉劉尚為尚書令裴秀占官田詔但推尚遷惠為太子太傅十月詔士卒遭父母喪者非在疆場皆得奔赴

泰始四年正月以尚書令裴秀爲司空車騎將軍尚書僕射賈充爲尚書令充等所修律令成始耕藉下詔班新律大赦二月罷中軍將軍官置北軍中候官中軍將軍羊祜遷尚書左僕射三月皇太后崩文明皇后王氏東海鄉人父肅魏中領軍后年八歲誦詩論語尤善喪服歸文帝生帝及遼東悼王定國齊獻王攸城陽哀王兆廣漢殤王廣德十月吳寇江夏襄陽交趾十一月寇合肥十二月始臨聽訟觀錄囚親平洩焉

泰始五年二月置秦州以尚書左僕射羊祜爲荊州都督右僕射東莞王佑爲徐州都督始謀吳也濟陰太守蜀人文立上言故蜀名臣子孫流徙中國者多量才叙用以慰巴蜀之心傾吳人之望從之擢立散騎常侍六月奚官督郭廙上言五事擢屯留令西平人麴路伐登聞鼓上書言涉妖謗有司奏棄市詔原之七月延羣公詢讜言十月汲守王宏政績著聞賜穀千斛十二月詔州郡舉

勇猛秀異之才

泰始六年正月吳寇渦口四月吳陸抗鎮荊州六月秦州刺史胡烈擊虜敗死萬斛堆詔撰泰始以來大事祕書寫副十一月幸辟離行鄉飲酒禮十二月吳孫秀來降拜驃騎將軍封會稽公泰始七年正月匈奴中部帥劉猛畔出并州塞二月吳主趣壽春遇雪還三月裴秀卒四月吳攻九真殺太守涼州刺史牽宏討畔胡敗死青山六月詔公卿各舉將帥一人帝憂關中甚七月侍中任愷中書令庾純請以賈充爲秦涼二州都督從之充不欲行其冬荀勗勸聘充女爲皇太子妃充遂畱吳陷交州八月置寧州是歲安樂思公劉禪卒

泰始八年正月并州監軍何楨購斬劉猛二月納皇太子妃帝與右將軍皇甫陶論事陶爭言不遜常侍鄭徽請罪之帝曰人主所

患者阿媚豈患爭臣哉微坐妄奏免七月以尚書令賈充為司空充與任愷有隙庭臣正直者多與愷帝召充愷宴式乾殿和解之愷竟得罪九月吳步闡以西陵來附十二月吳陸抗復取之

泰始九年三月吳進抗荊州牧七月吳寇弋陽詔聘公卿以下女備六宮采擇未竟權斷婚嫁得胡奮女左思妹皆為貴嬪胡貴嬪

有寵皇后有疾

武元楊皇后諱豔字瓊芝引農華陰人父文宗魏通事郎母趙氏生后而卒后長于舅家舅妻乳之文宗又娶于段文宗卒又隨後母依趙氏文帝欲為

世子求阮籍女籍不樂婚權貴沈醉六十日不醒文帝聞后相極貴遂聘焉生毘陵悼王軌惠帝泰獻王東武帝受禪立為后懷舅氏恩官趙俊至中護軍納俊兒女榮于後宮為夫人帝嫌皇太子暗弱不堪奉大統后曰立嫡以長不以賢豈可動也太子遂定賈充妻郭氏賂后求以女為太子妃及議太子婚帝欲聘衛瓘女后盛偁充女德色荀顗荀勗馮純又力贊之卒婚賈氏帝選六宮與后共擇之后性妬下藩女有美色帝掩扇謂后下氏女佳后曰下氏三世后族豈可在以卑位帝乃止及胡貴嬪有寵恐身沒之後且立為后臨終枕帝膝曰叔父駿女男有德色願陛下以備六宮因悲泣帝流涕許之泰始十年崩胡貴嬪名芳既入選下殿號泣左右止之曰陛下聞聲芳曰死且不畏何畏陛下帝多內寵平吳後又納吳宮人掖庭且萬人然芳最幸侍御服飾亞于皇后帝嘗與之博蒲爭矢傷帝指帝怒曰此固將種也芳對曰北伐公孫西距諸葛非將種而何帝甚有慙色左貴嬪名芬好學善屬文帝聞其名而納之初拜修儀後為貴嬪見陋無寵以才德見禮常居薄室帝每游華林園迴輦過之談詠文義而已

泰始十年閏正月詔曰近世以來多以內寵登后妃之職亂尊卑之序自今以後皆不得登用妾媵以為正嫡二月置平州七月皇

后崩九月吳陸抗卒邵陵厲公曹芳卒

咸寧元年正月大赦改元

凡即位及改元皆有赦是為常赦後不錄

二月賜故鄴令夏謨穀百

斛六月吳寇江夏初置太子詹事官八月定功臣十二人銘功太

常亾者配食清廟

已故鄭冲荀顗石苞裴秀王沈安平王孚在者何曾賈充陳騫荀勗羊祜齊王攸

十二月上宣景文三

帝廟號大疫帝有疾

咸寧二年正月以疫癘朝二月帝瘳五月立國子學大雩六月薦

荔枝于太廟吳孫楷來降拜車騎將軍封丹楊侯八月以司空賈

充為太尉齊王攸為司空十月羊祜上疏請伐吳立元后從妹楊

氏為皇后

后諱芷字季蘭小字男兒父駿有傳后生勳海陽王早薨遂無子永嘉元年追謚曰悼

大赦十二月封皇后父駿

為臨晉侯賜平州刺史傅詢帛二百匹前廣平守孟桓帛百匹

咸寧三年正月以扶風王亮爲宗師詔宗戚所施行皆咨宗師七月以王渾爲揚州都督八月徙封諸王以胡奮爲江北都督羊祜初鎮荊州

罷至是復置十二月吳寇汝南江夏

咸寧四年六月鮮卑寇涼州刺史楊欣敗死七月羊祜入朝十一月太醫司馬程據獻雉頭裘焚之祜卒于京師以尚書杜預代之咸寧五年三月以匈奴劉淵爲左部帥十一月伐吳初帝有滅吳之志故簡親賢爲邊吳州鎮吳方委任陸抗未有釁也抗卒荊州羊祜益州王濬連疏請大舉廷臣方以秦涼爲憂莫然祜計祜入朝帝遣中書令張華訪焉華獨贊成之帝遂拜華度支尚書委以兵食籌策祜薦杜預自代預至鎮請師期報待明年預又表曰自秋以來兵形頗露若皓懼而改圖明年之期恐無所及表至帝方與華圍碁華推枰斂手曰陛下聖明吳主暴虐當今討之不勞而

定時不可失也于是浚策徐州琅邪王佃出滁中揚州王渾出橫江豫州王戎出武昌荊州胡奮出夏口杜預出江陵益州王濬梁州唐彬下巴蜀東西並舉凡二十餘萬以賈充爲大都督冠軍楊濟副之總統諸軍駐襄陽十二月涼州平

咸寧六年正月王渾克尋陽二月王濬唐彬克丹陽西陵夷道樂鄉杜預克江陵胡奮克江安吳督將多死鎮戍相次降詔進濬都督深益二州所過諸將預奮戎等旣會濬彬共克定所分地卽分兵益濬彬直下移大都督充屯項濬進破夏口武昌乘勝所向莫敢枝梧而王渾周浚亦以三月破斬吳丞相張悌等于淝口板橋吳主孫皓窮蹙送璽綬詣佃約降事未浚濬舟師至石頭遂降于濬濬杖節受之送皓京師收其圖籍凡得州四郡四十三縣三百十三戶五十二萬三千吏三萬二千卒二十三萬牧守以下因用

之除其苛政初充之為大都督也慮無功表陳西有昆夷之患北有幽并之戎天下勞攘年穀不登興兵致討懼非其時及濬至武昌充又表吳未可悉定窆召諸軍以為後圖方夏江淮下溼疾疫必起雖要斬張華不足以謝天下荀勗請從之帝不納杜預聞充有奏馳表固爭使及輾轉而皓降四月賜皓爵歸命侯改元太康太康元年即咸寧六年五月皓至引見拜其太子為中郎諸子郎中擢用才望徙吳戰亡將士家屬于壽春將吏度江復十年百姓及百工二十年卒六十以上罷歸家濬預戎彬皆封侯充佃以下增封邑肅前卒遣使冊告其廟無子封其夫人夏侯氏為萬歲鄉侯通鑑作君非是九月羣臣請封禪弗許是歲以司隸為司州凡州十九郡國百七十三戶二百四十六萬帝以吳平天下無事詔罷州郡兵侍中僕射山濤爭之侍御史郭欽請因兵威徙諸胡出塞募民實其地皆

弗從

太康二年三月賜王公以下吳生口各有差選孫皓伎妾五千人納諸宮中掖庭僅將萬人帝常乘羊車游讌后父楊駿及駿弟珧濟並通請謁天下謂之三楊羊琇王愷皆外戚何劭石崇功臣子競為奢僭傳咸上書言侈汰之害甚于天災請加禁詰帝弗能用帝嘗南郊禮畢問司隸劉毅曰卿方朕漢何帝也對曰桓靈帝曰吾雖德不及古人猶克己為政又平吳會混一天下方之桓靈不已甚乎對曰桓靈賣官錢入官庫陛下賣官錢入私門以此言之殆不如也帝大笑曰桓靈之世不聞此言常侍鄒湛進曰世以陛下比漢文昔馮唐對文帝不能用頗牧而文帝怒今毅言犯順而陛下歡然接之以此相校聖德乃過之矣帝曰我平天下而不封禪然雉頭裘行布衣禮卿初無言今于小事何見褒之甚湛曰臣

晉書本紀一
聞猛虎在田荷戈而出凡人能之蠶董作于懷裏勇夫爲之驚駭
出于意外故也夫君臣有自然之尊卑言語有自然之順逆向毅
發言臣等莫不失色陛下降不世之詔出思慮之表臣之喜慶不
亦寡乎是歲揚州徙治秣陵

太康三年正月罷秦州出張華爲幽州都督四月賈充卒九月吳
故將筦恭帛奉反殺建鄴令圍揚州刺史周浚于秣陵徐州刺史
嵇喜討平之十二月以司空齊王攸爲大司馬出鎮青州帝之未
爲世子也文帝愛攸欲立之咸寧初帝邁疾中外皆以太子不慧
屬望攸攸素惡荀勗馮統詔佞勸統懼數譖之賴帝友愛至是譖
始行焉廷臣固諫不聽攸忿恚發病

太康四年三月薨于京師子冏嗣爲齊王

太康五年正月尚書僕射劉毅請罷中正除九品太尉汝南王亮

司空衛瓘請正土斷由鄉論選舉初魏陳羣以喪亂之後人士流
移吏部不得考詳乃令郡國各置中正州置大中正亦曰州都以
朝官德充才盛者爲之掌叙氏族人物定爲九品言行修著則升
之道義虧缺則降之雖遷徙流寓銓叙悉由本貫中正或不識面
但采聲望吏部用人皆據品高下爲格式下品終身廢棄又禁不
得自愬是以風俗競趨浮譽有識病之士斷者卽以所居爲鄉不
問本貫悉除中正九品之制使舉善進才各由鄉論也帝善之而
不行六月置黃沙獄職官志泰始四年置此從本紀是歲罷寧州

太康六年正月以比歲不登免租貸宿逋是歲鮮卑慕容廆入寇
太康七年十二月始聽大臣終三年喪

太康八年正月太廟殿陷七月前殿地陷九月改營太廟

太康九年三月皇后始親桑初并二社爲一五月詔舉可守令者

太康十年四月賜京兆守劉霄陽平守梁柳穀各千斛太廟成遂
裕大赦九月慕容廆降拜鮮卑都督復二社十月復明堂南郊五
帝位帝有疾故也十一月荀勗卒帝有瘳楊駿忌太尉亮排出之
遷大司馬鎮許徙封諸王紀有東莞公卷傳無改王國相為內史十二月太廟
梁折

太熙元年正月改元司空衛瓘遷太保罷三月帝疾篤念可以付
託太子者而舊臣多物故及以嫌退司徒王渾司空石鑿不足任
惟車騎將軍楊駿用事帝小間見駿有所易置非帝意帝曰何遽
爾邪時大司馬亮未發乃命留亮與駿同輔政中書作詔詔成駿
借觀之遂匿不出四月十二日辛丑帝迷亂后召中書作詔以駿
為太尉都督中外諸軍事錄尚書詔成進帝帝視而無言遂行之
駿趣亮赴鎮帝每問汝南王來未左右輒謬對二十日己酉帝崩

于含章殿太子即位太子素闇弱大臣多諷帝易太子帝以皇孫
適聰睿欲傳太子以及適故不易太子太子妃賈氏悍妬帝欲廢
之皇后以充功大為之請故不廢賈妃帝慮適非賈出恐致不安
乃用王佑計使太子母弟秦王東鎮關中楚王瑋鎮荊州瑋母弟
淮南王允鎮揚州以為外援而委政于駿又恐楊氏之偏授佑北
軍中候典禁兵既疑駿始復留亮駿及后卒匿而易之以至于崩
竟不復悟崩年五十五謚曰武廟號世祖陵曰峻陽

論曰帝仁恕受直言好謀能斷即位之初躬行節儉卒致一統及
吳平天下無事轉習為奢蓋慎德克終若斯之難也史以帝不易
太子不除劉淵為失計夫立嫡以長大順也傳子及孫至明也信
著殊俗懷柔無外至仁也安有逆億將來先備軌物而可僭得計
者乎惠雖庸懦失德未彰賈之悍妬事已明白不廢賈而替惠亦

失輕重之倫矣漢末之亂并割西陲雍虧北蔽涼失東藩魏氏爭
衡西南未遑董理戎索蔓延根株碩大晉平吳會曾是弗圖平陽
河東無維城擁護之重太原西河有轉石建瓴之勢一劉淵除復
一劉淵出芸芸豪酋可勝既乎且夫託孤寄命必在正人張華衛
瓘信非純德傅咸劉頌執節不回確然已信于前事雖漢之汲黯
何以加焉不早拔擢使登台鼎王渾石鑿徒取備員然則納諫者
好名之私心惡直者怙盈之積習蓋可識已周馥公旦以致刑錯
漢杖霍光而奠昭宣苟得其人一變已足而乃作計倚伏至于再
三將以奠磐石之安絕傾危之禍嗟乎智計所防雖巧而有限氣
節所植雖拙而無窮管子嘆四維不張乃身沒而齊亂其所由來
非一朝一夕之故可勝道哉

晉畧本紀二

孝惠帝

帝諱衷字正度武帝元后第二子也兄軌不育故得立爲皇太子
泰始八年年十四納賈妃妃嘗手殺孕妾故武帝將廢之賴悼后
以免悼后者元后之從妹也元后臨終以屬武帝故武帝納之后
既保護妃不以告自誠妃妃反憾焉太熙元年四月二十日己酉
武帝崩后父楊駿受遺詔輔政是日太子卽位改元永熙
永熙元年卽武帝太熙元尊皇后曰皇太后立妃賈氏爲皇后五月葬武帝
以太尉楊駿爲太傅都督中外錄尚書如故八月立子適爲皇太
子起前太常張華傅之或言不踰年改元非禮也乃下詔改明年
爲永平元年

永平元年正月皇太子冠見于太廟后旣不肯尊事太后又爲太

傳駿所抑不得治政二月私召汝南王亮使入圖駿亮不敢應乃召楚王瑋瑋少年剛猛喜事即與淮南王允俱入朝三月后誣駿反詔瑋及東安公繇殺之族其黨改元元康駿之被收也太后射帛書于外曰救太傅者有賞后遂宣言太后同逆遷永安宮

元康元年即永平元羣臣上奏曰皇太后陰漸姦謀圖危社稷飛箭繫書要募將士同惡相濟自絕于天昔魯侯絕文姜春秋所許蓋以奉順祖宗任至公于天下也陛下雖懷無已之情臣下不敢奉詔可宣敕王公于朝堂會議及議有司奏寔廢為峻陽庶人太子太傅張華以為太后非得罪于先帝今黨惡所親為不母于聖世寔依漢孝成趙皇后故事併為武帝皇后處之離宮以全貴終之恩尚書令下邳王晃等議以為皇太后與駿潛謀欲危社稷不可復奉宗廟配食先帝寔尊號廢詣金墉城有司請從晃等議詔不許

固請乃可之駿之死也妻龐免坐聽就太后居及是有司又奏駿家屬應誅詔原龐命者所以慰太后之心今太后廢請以龐付廷尉詔聽隨庶人有司固請乃從之龐臨刑太后抱持號叫截髮稽顙上表詣后併妾請全母命不見省徵大司馬亮為太宰起太保璿于家亮璿名為輔政政實出于后后族兄模從舅郭彰女弟子賈謐與璿並預政繇迺后免官徙帶方六月后矯詔令瑋免亮璿官瑋殺之并誅瑋張華裴頠用事七月置江州八月立隴西王泰世子越為東海王十月趙王倫鎮關中倫任嬖人孫秀始失羌戎和是歲以劉淵為五部大都督

元康二年二月皇太后食絕崩于金墉城

元康三年

元康四年五月匈奴郝散反上黨八月詣馮翊降都尉殺之

元康五年

元康六年正月大赦以張華為司空侍中中書監如故五月郝散弟度元反馮翊北地趙王倫弗能討代以深王彤秦雍氏羌皆畔八月氏齊萬年僭帝圍涇陽是歲氏楊茂搜始保仇池

元康七年正月建威將軍周處討齊萬年戰死六陌關中頻年饑疫人民流徙就食

元康八年畧陽流民李特自漢中入蜀

元康九年正月齊萬年伏誅徵彤為大將軍錄尚書以河間王顒代鎮關中自后之殺楊駿汝南王亮衛瓘委政張裴雖不能匡維大節然庶事咸理八年之中幸無大變侍中賈謐數出入二宮傲太子成都王穎見而叱之謐怒出穎鎮鄴太子怒謐懼譖諸后后素淫縱無子納少年宮中求子卒無子乃詐有身納產具陰取謐

弟慰祖為己子託言帝亮闇所生故弗顯欲以易太子十二月誣太子大逆廢為庶人及皇孫彪臧尚皆幽金墉

永康元年正月改元閹纘上書訟太子后恐有變使黃門自首欲與太子謀逆更幽許昌皇孫彪卒趙王倫有異圖謀廢后以收人心其黨孫秀畏太子英睿勸倫激后使殺太子然後廢后三月后殺太子于許昌四月倫與深王彤勒兵殿中使翊軍校尉齊王冏入宮廢后為庶人幽金墉誅后黨遂殺司空華僕射顧大赦追復故太子位號倫自為相國都督中外如宣文輔魏故事進彤太宰賜后死五月立臧為皇太孫封皇孫尚為襄陽王八月驃騎將軍淮南王允舉兵討倫不克死之齊王冏之助倫廢后也遷游擊將軍冏意不滿倫覺之出冏鎮許昌倫自加九錫九月罷司徒官拜彤為丞相十一月立皇后羊氏

后諱獻容泰山南城人祖瑾父元之外祖孫旂時與倫黨孫秀合族故秀主立之將入宮衣中有火其後

數更廢立懷帝時尊為惠帝皇后居引訓宮洛陽陷為劉曜所得後為曜皇后大赦益州刺史趙廞賈氏之媼也被徵

為大司農懼遂反以李特兄弟為督將

永康二年正月常侍張軌求涼州詔以為征西軍司俄拜刺史九日乙丑倫偪帝禪位改年建始明日遷帝金墉號金墉城曰永昌宮號帝曰太上皇廢皇太孫滅殺之李特殺趙廞拜宣威將軍三月齊王冏起兵許昌傳檄討倫成都王穎應諸鄴常山王乂率國兵為穎後繼河間王顒在關中初助倫既而更應二王倫分兵拒二王冏戰陽翟不利入壁倫兵夜忽自潰冏復振穎戰黃橋先敗後勝遂度河四月七日辛酉倫黨王興及淮陵王濯勒兵入宮逐倫斬其黨孫秀等迎帝復位九日改元永寧

永寧元年即永康二年深王彤表倫大逆窆伏誅十三日賜倫死成都王穎入京師河間王顒亦至五月立襄陽王尚為皇太孫冏尚與倫黨

相持穎發兵助破之六月齊王冏入京師大赦穎以冏首謀讓功于冏詔拜冏大司馬中外都督穎大將軍錄尚書顒太尉乂撫軍大將軍領左軍罷丞相復置司徒彤以太宰領司徒穎顒皆還鎮冏留執政七月復常山王乂故封為長沙王遷驃騎將軍八月王興謀廢冏族之大赦十月李特反于蜀

永寧二年三月太孫尚薨五月李特陷梓潼巴西詔立清河王遐子覃為皇太子以冏領太子太師本紀脫太子字今從通鑑東海王越為司空十二月顒露表劾冏專擅不平請敕乂廢冏而徵穎入輔冏襲乂乂入宮奉帝攻殺冏改元太安

太安元年即永寧二年陳留王曹奐卒謚曰魏元帝

太安二年正月李特入成都少城年號建初三月益州刺史羅尚襲斬特子雄領其眾與尚相持五月義陽蠻張昌反荆湘其黨

石冰寇揚州封雲寇徐州八月荊州刺史劉_宏討破昌昌逃入山
數月伏誅河間王顥本欲激罔殺父而後除罔計已不行遂反以
除后父羊_元之左將軍皇甫商爲名實規殺父因廢帝立穎穎亦
忌父在內已不得肆志故應之先是穎表征張昌以陸雲爲都督
自率大軍繼之未至而昌敗遂班師聞顥起因應顥顥將張方軍
七萬自函谷而東帝親御六軍以父爲太尉大都督討方至十三
里橋聞穎悉發河北軍以陸機爲都督與征昌軍合凡二十餘萬
軍勢甚盛乃使皇甫商將萬餘人西拒方窻陽而還師討穎九月
至緱氏聞商敗_元之憂懼卒師退穎軍進復拒之走其將牽秀大
赦張方入京城十月帝還宮方敗走出城穎將石超赫緱氏陸機
犯建春門王師大破之遂討方方退屯十三里橋夜更前作壘偏
京城十一月攻之不克穎兵復進方洩千金塲城中水磴皆涸發

王公奴婢春給軍一品以下不從征者男子十三以上皆從役十
二月東海王越執父幽金墉穎已還鄴聞之諷帝改明年元父尋
爲張方所殺議郎周玘起兵討石冰閏十二月羅尚棄成都走江
陽李雄盡據益州地詔復置寧州是歲幽州都督王浚表封鮮卑
段務勿塵爲遼西公

永安元年正月改元

本紀上年十二月癸亥執父幽金墉尋爲張方所殺通鑑據父傳童

本紀而從父傳作正月二十五日癸亥執父乙丑殺父按父傳武帝崩父年十五死年二十八正太
安二年也若至今年則當云二十九自相矛盾如此且正月改元距父被幽止餘四日洛至鄴五百
五十里穎在鄴聞父被執乃諷帝改元應在二月矣若嫌廣卒不應在父敗後者廣以女爲穎妃故
父忌之憂懼而卒非自殺也疾在父未敗前卒在父死後有何難通豈必疾日卽爲卒日若嫌童言
上年閏十二月立雍州刺史劉沈奉詔討顥顥急召方方大掠而西穎入

于京師自爲丞相屯兵十二門盡代宿衛殿中所忌者皆殺之復
還鄴遙執朝權二月穎廢皇后羊氏幽金墉黜皇太子覃復爲清
河王石冰封雲伏誅顥表立穎爲皇太弟穎表顥爲太宰七月丙

晉書本紀二
申朔右衛陳豨以詔召百官入殿中勒兵大赦復后太子推越爲
大都督己亥奉帝討穎至安陽東安王繇時在鄴勸穎迎帝穎不
從遣石超拒戰王師敗績于蕩陰三矢集帝面短兵及乘輿侍中
稽紹以身衛帝死之超劫帝如鄴殺東安王繇改元建武

建武元年即永眴及長沙故將上官己奉太子守京師越奔下邳遂
歸國八月琅邪王睿自鄴逃奔京師遂歸國張方助穎攻京師上
官己拒之不勝太子逐己迎方方入廢太子及后幽州王浚并州
東嬴公騰共攻穎穎使劉淵發匈奴五部兵以禦之淵遂反穎棄
鄴奉帝還京師服御分散無齎貨中黃門被囊中私錢三千買飯
供宮人止道中客舍食帝以瓦瓮盛麤飯噉燥豆鹽豉夕御中黃
門布被至溫謁陵喪履納從者履涕且拜濟河張方遣子羆率三
千騎以陽燧青蓋車逆帝而自俟于邙山將拜帝下車止之還宮

大赦十一月方請帝謁廟因劫帝西遷帝走避後園竹中方偏帝
升車大掠後宮府藏挾穎及豫章王熾而西次新安寒甚帝墮車
傷足至霸上顓率官屬迎顓謁帝下車止之入長安卽征西府爲
宮僕射荀藩司隸劉暉太常鄭球河南尹周馥在洛爲留臺承制
大赦復皇后仍僞永安元年十二月顓廢太弟穎復爲成都王立
豫章王熾爲皇太弟帝兄弟二十五人于時存者惟穎熾及吳王
晏晏材下而熾好學故顓立之改元永興

永興元年

即永

詔進司空越爲太傅與太宰顓分陝夾輔冀以和越

越不受顓自加中外都督是歲李雄僞成都王劉淵僞漢王

帝紀在十一月

通鑑在十月攷異引華陽國志凡有兩本一在十月一在十二月意者僭號在先奏報在後致有不同歟

永興二年四月張方脇留臺廢后初秦州刺史皇甫重奉詔助雍
州刺史劉沈討顓沈敗死重被圍至是重遣養子昌求救于越越

以顓有善意不肯出兵昌乃與故殿中人楊篇詐僞越命迎后入宮以后令發兵討方且迎大駕不克死之七月越傳檄迎帝徐州都督東平王楸以州讓越而自領兗州豫州刺史劉喬亦以兵應越八月大赦越進至蕭以其弟范陽王虓代喬移喬冀州虓又使兗州刺史苟晞還鎮而移楸青州楸喬皆怒喬攻虓虓走河北喬及楸皆反越爲顓初穎故將公師藩聚眾以羯人石勒爲軍鋒攻殺郡吏顓懼九月表穎督鄴以安河北而使呂朗屯洛拒東軍十一月立節將軍周權復立后以應越洛陽令何喬攻殺權復廢后顓矯詔賜后死留臺不奉詔十二月穎至洛朗移屯滎陽虓以幽冀之師破朗等楸走還國喬奔平氏越進屯陽武是役也王浚將祁宏率突騎及鮮卑烏桓爲前驅故西師皆敗右將軍陳敏爲越收兵歷陽遂反據揚江寇荆

永興三年正月顓斬張方以和越越弗許穎兵又敗三月王彌反東萊四月越進屯溫兵遂西顓使拒諸湖五月祁宏敗湖軍遂入關顓奔太白山中鮮卑大掠長安死者二萬餘人帝御牛車東還公卿多徒行行宮藉艸六月至京師謁太廟復皇后改元光熙光熙元年即永興三年李雄僞帝于成都國號成八月越受太傅之命錄尚書十一月十七日己巳夜帝食麪中毒明日崩于顯陽殿年四十八謚曰孝惠陵曰太陽

孝懷帝

帝諱熾字豐度武帝第二十五子也太熙元年封豫章郡王孝惠時宗室構禍王閉門不交世事以文籍自娛初拜散騎常侍倫篡王被收倫敗爲射聲校尉索遷車騎大將軍青州都督未之鎮永興元年遷鄴督惠帝子孫旣盡清河王覃爲太子成都王穎爲太

弟先後廢其年立王爲皇太弟從還京師光熙改元十一月庚午
惠帝崩皇后恐太弟立則己不得爲太后急召故太子覃侍中華
混露版召越及太弟覃先入待命尚書閣太弟入覃乃出二十一
日癸酉太弟卽位太傅越輔政十二月徵河間王顒爲司徒越弟
南陽王模殺諸塗葬孝惠皇帝

永嘉元年正月改元除三族刑三月陳敏伏誅改葬武悼楊皇后
立清河王覃弟豫章王詮爲皇太子大赦帝始復泰始故事親聽
政東堂太傅越不懌自統大眾出鎮許昌五月石勒從馬牧帥汲
桑陷鄴殺新蔡王騰南侵兗州越使兗州刺史苟晞將軍王讚討
之七月自屯官渡爲晞讚聲援詔琅邪王睿都督揚州江南鎮建
鄴八月置湘州九月苟晞破汲桑于鄴勒走樂平十月附于漢十
二月桑伏誅北軍中候呂雍度支校尉陳顏謀復立清河王覃爲

太子越誅之幽覃金墉詔進越丞相不受自領兗州牧移苟晞都
督青州晞由是怨越

永嘉二年正月大赦漢劉淵使劉聰等十將南據太行石勒等十
將東下趙魏于是司豫兗青徐五州郡縣被陷者十三四二月越
殺清河王覃聞王彌已陷許昌越自鄆城使司馬王斌將五千人
入衛五月彌入自轅轅敗王師于伊北京師大震宮城晝閉彌屯
津陽門詔司徒王衍都督征討諸軍事涼州入衛將北宮純募勇
士突陣敗彌彌燒建春門而東衍使左衛將軍王秉追敗之七里
淵彌走歸漢七月漢劉淵寇平陽河東取之徙都蒲子詔豫州刺
史裴憲屯白馬車騎將軍王堪屯東燕以拒彌勒平北將軍曹武
屯大陽以備淵十月淵僞帝本紀下有于平陽三字非是國號漢十二月大赦

永嘉三年正月漢徙都平陽三月越自滎陽入于京師殺帝舅王

延及侍臣十餘人自領司徒以司徒王衍為太尉初衍說越用兼資文武者為方鎮越用衍弟澄為荊州敦為青州至是又以敦為揚州越奏罷宿衛代以東海國兵于是左積弩將軍朱誕叛奔漢

本紀在四月

從劉景陷黎陽敗王堪于延津死者三萬人四月漢石勒會

劉聰王彌圍壺關敗并州刺史劉琨淮南內史王曠上黨叛降淵

七月聰襲晉陽弗克

自圍壺關至此本紀在七月通鑑在四月一紀其始一紀其終耳

八月聰入寇九月圍浚

儀越使曹武禦之敗績聰遂攻京師越破之宣陽門聰去西畧地至寧陽引農太守垣延偽降夜襲破聰聰走還平陽越使王堪曹武討漢為聰所敗十月聰及王彌劉曜劉景率精騎五萬復自大陽趣寧陽以寇京師呼延翼率步卒繼之聰屯西明門北宮純夜率勇士千餘入其壘斬其大將呼延顥聰退屯洛南呼延翼為其下所殺翼眾自大陽潰歸淵令聰還聰固請留攻自禱嵩山留呼

延朗劉厲護其營王師乘虛擊之斬朗厲慙赴水死王彌說聰曰洛陽守備猶固未可卒下軍既失利運車在陝糧食不繼此危道也不如且還彌請收兵積穀待命于兗豫聰自以請留未敢還會淵復召之十一月罷去彌出轅轅掠潁汝流民多殺長吏以應之

者

本紀九月聰圍浚儀曹武討之武敗越入保京城聰至西明門越禦之戰于宣陽門外大破之使王堪曹武討聰堪敗還京師聰攻西明門不克十一月乞活李暉等入援聰師乃退通鑑八月淵命聰進攻洛陽曹武敗聰長驅至寧陽為垣延所敗十月復寇洛陽朝廷以漢兵新敗不意其至大懼聰屯西明門敗退屯洛南又敗乃還二說互異按本紀失聰寧陽之敗通鑑于曹武前敗不言聰攻浚儀又失宣陽門一戰故叙事俱不明晰聰兩次入寇所由異路先由浚儀而洛都而寧陽既為垣延所敗遂由大陽北渡十月復寇則自西而東也垣延勝後又有王堪一敗通鑑所云漢兵新敗為失實矣李暉入援通鑑不載按暉後為龍驤將軍與何倫留守京師始即以入援

克敵立功顯授也參稽彼此揆度形勢本紀為長故從之而以寧陽一敗附宣陽之後石勒寇冀州殺刺史詔王堪裴憲討之本紀失此事勒還兵南下憲堪皆走十二月彌使曹嶷寇青州

永嘉四年正月大赦二月勒寇兗州殺刺史袁孚于鄆城車騎將軍王堪于倉垣復北擾冀州建威將軍錢璿反吳興三月周玘討

平之王彌將曹嶷陷東平進攻琅邪五月勒南陷汲滎陽會劉曜陷河內河內督將郭默收餘眾據塢自保八月漢主劉淵死子和

立和弟聰殺和自立

本紀在六月通鑑在七月十六國春秋在八月按七月寇河內十月寇洛陽八九兩月正淵死聰篡時也

氏蒲洪自

偁秦州刺史畧陽公九月雍州流民王如反南陽遙附漢十月漢

劉粲與曜彌入寇勒會之大陽長驅入洛川粲出轅轅掠梁汝陳

穎勒出成皋陳留內史王讚敗諸倉垣乃渡河屯文石津王浚遣

鮮卑段文鴛討敗之

本紀誤在勒陷襄城下

詔加浚司空劉琨發代公拓跋猗盧

兵約太傅越共討劉聰越內防苟晞恐兵出而晞襲其背竟弗能

應京師飢困越羽檄徵天下兵入援帝謂使者曰爲我語諸征鎮

今日尚可救後無及矣荊州都督山簡遣督護王萬人援至涅陽

爲王如所敗如遂偪襄陽簡嬰城自守荊州刺史王澄自將入援

至汴口聞簡被困眾散而還

本紀在九月

自涼州而外無復至者朝議多

欲遷都避難王衍不可石勒南陷襄城遂寇襄陽太傅越戎服入

見請出討勒帝固止之不可十一月留龍驤將軍李暉右衛將軍

何倫守京師以潘滔爲河南尹總留事自率甲士四萬向許昌以

行臺自隨用太尉王衍爲軍司朝賢素望名將勁卒咸屬焉朝廷

宮省無復守衛盜賊公行殿內死人交橫府寺營署並掘塹自守

暉等縱兵劫掠暴及公主竟陵王楙白帝遣兵襲之不克帝委罪

于楙楙走乃免越東屯項自領豫州牧揚州都督周馥表請遷都

壽春越以不先白己大怒朝臣畏越莫敢贊其議者

永嘉五年正月苟晞爲曹嶷所敗棄青州奔高平成陷涪城梓潼

太守譙登死之醴陵令杜弢反湘州二月石勒寇汝南汝南王祐

奔建鄴寇新蔡殺新蔡王確于南頓進陷許昌殺平東將軍王康

初帝密詔苟晞討太傅越晞移屯倉垣使劉會將船載穀及衛士

迎帝而上表請廢越越使兗州刺史楊瑁徐州刺史裴盾攻晞晞使騎兵收殺越黨尚書劉曾侍中程延于京師河南尹潘滔走免

三月下詔罪狀越進晞大將軍都督兗豫青徐荆揚六州越憂憤

發病薨密詔討越本紀在正月通鑑考異辨之置于越薨之時按越留兵縱掠帝所不堪上年十一月即有竟陵之事旋詔晞施檄六州協同大舉雖未明言討越實欲晞自為之如竟陵故事耳晞奉詔而未行故本年正月復使李初奉手詔詣晞晞表稱李初至奉被手詔卷甲長驅次于倉垣正是正月開事即表討越即請遷都時越黨尚在京師故公卿畏懼沮遷都之議也晞使還為越所得故越攻自帝之親政越有貳志既漸交惡至空京師以

晞晞殺越黨正月開事也

出鎮及薨軍為石勒所覆李暉何倫留守之軍亦以奔越喪去國

竝見覆沒于是河北諸郡盡沒于漢冀青兗豫悉為王彌石勒所

殘破徐州為王桑所陷寇至歷陽矣五月進王浚大司馬南陽王

模太尉琅邪王睿鎮東大將軍晞之迎帝帝欲東公卿畏越左右

戀貲財不肯去至是乃議東使司徒傅祗具舟河陰帝步出西掖

門朝士從者數十人行至銅駝街遇盜而還漢將呼延晏入寇曜

彌勒皆會未至晏以二萬七千人先進王師禦之十二敗死者三

萬餘人癸未及國甲申攻平昌門丙戌晦門陷遂焚東陽門及諸

府寺六月丁亥朔晏以後軍未至大掠出城焚洛水舟船四日司

空荀藩光祿大夫荀組奔轅轅五日彌至宣陽門六日曜至西明

門十一日彌晏破宣陽門入宮大掠帝至華林園出河陰瀉池欲

西幸長安為寇兵所逼遷于端門十二日曜入據武庫太子諸王

公卿皆遇害后妃公主多被僇辱士民死者三萬餘人諸陵皆毀

宗廟宮室皆燔燒帝及六璽遷平陽于是傅祗建行臺于河陰荀

藩建行臺于密豫章王端東奔倉垣荀晞奉以為太子置行臺于

蒙城王浚亦詐僞立太子于薊而秦王鄴自洛奔密自密入武關

卒立為愍帝焉八月長安陷南陽王模降賊被殺九月蒙城陷荀

晞被禽豫章王端遇害

晞被禽豫章王端遇害

永嘉六年四月關中諸將復長安九月立秦王鄴爲皇太子羌姚弋仲自稱雍州刺史扶風公明年二月丁未朔帝遇害于平陽年三十謚曰孝懷

孝愍帝

帝諱鄴字彥旗吳敬王晏之子武帝之孫也爲秦獻王東後故襲封秦王永嘉二年拜撫軍將軍五年六月洛都陷王年十二避難于密遇其舅荀藩荀組南趣汝潁豫州刺史閻鼎奉以入關時長安已陷而關中諸將謀興復十月敗劉曜走劉粲十二月王入雍永嘉六年四月走劉曜復長安九月三日己卯賈疋等立王爲皇太子以閻鼎爲太子詹事攝百揆賈疋爲征西大將軍雍州刺史進秦州刺史南陽王保大司馬其冬疋討胡戰死鼎爭權被殺以麴允領雍州

建興元年四月丙午朔懷帝凶問至二十七日壬申太子卽位改元以深芬爲司徒麴允索綝爲僕射軍國之事悉以委綝自懷帝之遷平陽也劉聰以洛陽四面受敵棄弗守故司州諸將帥猶得稍稍屯聚然皆不足以自固石勒出轅轅東襲王讚苟晞并王彌南掠豫州屯葛陂雨甚疫作北還據襄國王浚詐立太子陰圖僭逆用段氏以討勒段氏反附勒西構怨并州東不能制慕容廆廆遂擊并旁部僞雄遼東劉琨倚代援與浚交惡爲聰所襲破棄州治保陽曲琅邪王睿擊并江州殺刺史華軼而杜弼未平王冲胡亢杜曾王機相繼作亂方戡定荆湘交廣無北顧心南陽王模鎮關中使趙淦成蒲阪淦叛降聰以致覆敗其子保嗣王據秦州涼州張軌入援格于秦州不得東自惠帝時羌胡數反關中固已耗壞河間窮兵見破鮮卑粲曜繼虐所驅畧八萬餘口及帝卽位政

晉書本紀二
令所及東不過引農南不過漢中西不踰隴北以馮翊北地爲邊
徼長安城中戶不盈百蒿棘成林公私財有車四乘百官無章服
印綬桑版署號而已是以崇寵州鎮濫加爵命以冀集事卒用地
徧食闕力竭而亾漢將劉曜喬智明入寇麴允禦之黃白城石勒
陷鄴使弟虎據之王浚使棗嵩屯易水召段氏欲與共討勒段氏
不至浚怒賂代檄鮮卑都督慕容廆共攻段氏代兵敗廆取徒河
五月以琅邪王睿爲左丞相大都督陝東諸軍事南陽王保爲右
丞相大都督陝西諸軍事詔保援長安睿詣洛陽以圖興復八月
殿中都尉劉蜀奉詔至建康睿辭以江東未定兵竟不出杜曾殺
胡亢并其眾江東荊州刺史周顛爲杜弼所逼武昌太守陶侃救
之弼走還長沙征討都督王敦上侃功遂以代顛九月司空荀藩
卒于開封十月曜襲長安入外城十一月麴允襲破之斬喬智明

曜走還平陽十二月王浚謀僭號石勒僞附之

建興二年正月大赦進張軌太尉荀組司空劉琨大將軍三月石
勒執王浚段匹磾自領幽州刺史據薊與樂陵太守邵續同附江
東五月張軌卒子寔攝位六月劉曜趙染寇長安索綝敗之加綝
驃騎大將軍錄尚書曜染復入寇麴允斬其將殷凱七月染寇北
地允射殺之十月拜張寔爲涼州都督

建興三年二月進左丞相睿爲丞相大都督中外諸軍事右丞相
保爲相國荀組爲太尉劉琨爲司空代公拓跋猗盧爲代王杜弼
旣降復反三月曹嶷據臨淄石勒惡其強言于聰請攻之聰弗許
四月大赦六月盜發漢陵詔收其餘以實內府大赦八月江東破
杜弼湘州平睿承制赦其所部進王敦鎮東大將軍江揚荆湘交
廣六州都督江州刺史敦始自選置刺史以下官屬初深州刺史

張光卒詔以侍中第五猗爲荆深寧益四州監軍荊州刺史杜曾
逆諸襄陽爲兄子娶猗女分據漢沔江東荊州刺史陶侃旣破杜
弢進擊曾不克王敦左轉侃廣州用其從弟廙代侃侃故將吏遂
迎曾曾迎猗拒廙廙走江安九月劉曜寇北地加麴允大都督驃
騎將軍以禦之十月以索綝爲宮城都督曜陷馮翊轉寇上郡地理志無
上郡允兵弱不敢進詔徵相國保入援不至十二月涼州軍士得皇
帝行璽刺史張寔遣使上之

建興四年正月司徒梁芬議追尊吳敬王索綝等以爲不可乃贈
太保改謚曰孝三月代王猗盧遇弑國亂所統晉人及烏桓相率
歸劉琨五月寧州平夷平樂叛降成七月劉曜陷北地遂至涇陽
渭北諸城悉潰建威將軍魯充散騎常侍深緯少府皇甫陽皆被
執不屈死曜見緯妻辛美將納之辛哭曰妾夫已死義不獨生曜嘉之聽自殺以禮葬之通鑑唯言充不屈據此則緯陽皆死難也河東平陽大蝗

民流殍十五六石勒使將屯上黨招納二十萬戶漢主聰使讓之
弗聽潛結曹疑八月曜偪長安九月破外城小城食盡十一月十
一日乙未帝出降羣臣號泣攀車帝亦悲不自勝御史中丞吉朗
嘆曰智不能謀勇不能死何忍君臣相隨北面事賊虜乎乃自殺
曜送帝平陽是月石勒圍樂平劉琨救之敗績十二月并州降勒
琨奔薊丞相睿聞長安不守出師露次躬擐甲冑移檄四方克日
北征然兵老不出以糧乏斬督運令史淳于伯而罷明年遂僭晉
王其冬帝遇害于平陽年十八謚曰孝愍

論曰武帝大封同姓欲以固盤石之宗而首忌齊王攸可謂自相
矛盾者也及其顧命牽于所昵復舍親藩而任外戚軍容旣具亂
本亦成雖有朱虛東牟之勳其爲禍敗乃更甚于七國惠帝流離
播遷懷帝局促受制愍帝號呼罔應何其酷也且夫政本不立徒

鑒前敗而改制則制立而敗隨之後之論者復不深探致敗之由而一求之于制是覆車終無已時也聖王之治則不然因其已然之勢而不爲紛紜膠擾故天下不震于其所不習推其致敗之由而陰驅默塞使之轉移于不自知當魏晉閒功名之路盛開廉恥之防盡滅蓋非崇名教紬利權無以云救此其君臣所當皇皇日夜以圖之者而姑置之而紛紛更制三帝卅年中原傾覆非不幸也

晉畧本紀三

元帝

西都惠懷愍皆冠孝字漢法也東都唯孝武冠之以別于世祖按元帝簡文俱可云用光武中興之例自餘諸帝不應不冠孝字或時制改易或記載不同無可攷矣

帝諱睿字景文宣帝曾孫也祖佃字子將魏征虜將軍兗州監軍刺史晉受禪封東莞王拜尚書右僕射都督徐州得將士死力吳人甚憚之加開府儀同三司改封琅邪以東莞益其國伐吳出淝中獲吳督蔡機降五六萬人孫皓奉牋送璽綬吳平加督青州佃雖尊屬有大功然能克己恭儉無矜滿之色僚吏盡力百姓懷化太康四年薨謚曰武子恭王覲嗣太熙元年薨子睿嗣睿以咸寧二年生洛陽有光照室及長白豪生于日角之左隆準龍顏顧盼煒如也年十五嗣王惠帝時王室多故恆以退讓自免元康二年拜左將軍蕩陰之敗從駕在鄴叔父東安王繇正言遇害王懼欲亾時成都擅政禁衛甚嚴且飭關津毋得出貴人其夜月正明忽

晉書本紀三
大雷雨微者皆弛遂得出河陽津吏不聽過宋典自後至以鞭拂
王笑曰舍長官禁貴人汝亦被止邪遂得渡入都奉太妃夏侯氏
以歸琅邪東海王越起兵以爲平東將軍監徐州留守下邳遷安
東揚州江南都督鎮建鄴用司馬王導策辟顧榮賀循等爲參佐
賓禮名士存問風俗江表歸心焉太妃薨于國王自表奔喪葬畢
還鎮加鎮東大將軍開府儀同三司越怒揚州都督周馥王因攻
走之兼有淮南之地洛陽陷司空荀藩等移檄天下推王爲盟主
江州刺史華軼豫州刺史裴憲拒命斬軼憲奔幽州當是時王如
亂荊州杜曾王冲繼之杜弼亂湘州石勒據葛陂王乃大集江南
之眾于壽春以長史紀瞻爲揚威將軍都督諸軍討破勒弟虎荆
州刺史王澄爲王冲所逐王代以周顛顛復困于杜弼王以揚州
刺史王敦爲征討都督駐豫章督武昌太守陶侃等討之建興元

年拜左丞相詔令收復洛陽軍諮祭酒祖逖請行授豫州刺史使
募兵自進陶侃破杜弼卽以侃代顛爲荊州二年冬徐馥孫弼作
亂三年春平之二月進丞相湘州平杜曾誅王冲以自贖旣而復
反侃擊之不勝王敦素忌侃因左轉廣州廣州方大亂侃至悉定
石勒旣併王浚浚將邵續劉遐遣使來附以續爲冀州刺史遐爲
平原太守四年十一月長安不守五年二月二十八日辛巳平東
將軍引農太守宋哲至建康宣愍帝出降前一日詔命王攝萬幾
據舊都修復陵廟以雪大恥王素服出次舉哀三日西陽王羨及
官屬等上尊號不許固請王流涕曰孤罪人也諸賢見逼不已唯
有歸琅邪耳遽呼私奴命駕羨等請依魏晉故事僭晉王許之三
月九日辛卯卽晉王位改元建武

建武元年即建興五建宗廟社稷于建康備百官立世子紹爲皇太子封

晉書卷之三
子褒爲琅邪王奉恭王祀西陽王羨爲太保封譙剛王遜子承爲
譙王王敦爲大將軍江州刺史王導爲驃騎將軍領中書監錄尚
書僕射刁協御史中丞劉隗親近用事六月劉琨段匹磾及諸方
鎮使溫嶠奉表勸進曹嶷與焉諸州使者繼至王優令答之祖逖
復譙王傳檄天下僞遣琅邪王褒將卒三萬會逃北伐軍竟不行
八月漢將趙固以洛陽來附九月周訪破杜曾進深州刺史鎮襄
陽十一月進劉琨太尉始立太學置史官十二月趙固郭默討劉
聰及絳聰右司隸部民多從之聰懼遂害愍帝攻固于洛陽固奔
陽城山是歲揚州大旱王命課農二千石長吏以穀入多少爲殿
最諸軍各田作自給

建武二年正月戊申朔王臨朝縣而不樂三月愍帝凶問至王斬
衰居廬百官上尊號不許紀瞻固請奉朝請周嵩上疏請先雪大
恥以副四海之心王不悅出爲新安太守十二日丙辰卽皇帝位
改元太興

太興元年卽建武二年立王太子紹爲皇太子授慕容廆龍驤將軍大單于
昌黎公廆辭公滎陽太守李矩救趙固渡河襲敗劉粲還戍虎牢
五月太尉劉琨爲段匹磾所殺曹嶷以青州叛附石勒六月改丹
楊內史爲尹以刁協爲尚書令進李矩司州刺史初置諫鼓謗木
七月劉聰死子粲立八月靳準殺粲滅劉氏之在平陽者使告李
矩請歸懷愍二帝梓宮矩表聞遣太常韓允等奉迎未至而準敗
準之殺粲也劉曜石勒各起兵攻之十月曜僞帝十一月暴雨震
電詔羣臣極言得失加陶侃笄督交州孫皓子璠謀反伏誅十二
月彭城內史周撫殺沛內史周默叛附勒詔下邳內史劉遐領彭
城內史與徐州刺史蔡豹泰山太守徐龕共討之

晉書卷之三
太興二年正月崇陽陵毀帝素服三日哭詔冠軍梁龕太常馬龍
等修之二月徐龕斬周撫論功遷遐臨淮太守蘇峻從遐有功拜
淮陵內史賞不及龕三月立郊丘帝親郊并祀地祇詔琅邪恭王
宓稱皇考太常賀循諫曰禮子不敢以爵加父乃止石勒克平陽
獻捷于劉曜疑之勒怒叛曜四月龍驤將軍陳川以浚儀徐龕
以泰山叛附勒劉曜定都長安南陽王保自稱晉王改年建康置
百官于上邽其將陳安自稱秦州刺史叛降曜五月太陽陵毀祖
逖討陳川不克退屯壽春杜曾伏誅六月劉曜改國號曰趙徐龕
陷東莞八月使征虜羊鑒督蔡豹等討之十一月石勒僭趙王是
爲後趙十二月大赦慕容廆逐崔毖據平州是歲蒲洪降于趙
太興三年正月冊故妃虞氏爲皇后晉王保爲趙所逼遷于桑城
二月後趙石虎寇厭次執冀州刺史邵續趙洛陽戍將叛附後趙

餘民歸李矩洛陽遂空三月慕容廆使裴嶷歸玉璽三紐于京師
詔拜廆安北將軍平州刺史五月晉王保爲其下所殺徐龕乞降
弗許羊鑒坐討龕不進除名六月西平公張寔爲其下所刺弟茂
立七月置懷德縣于京師以統琅邪流人優復之比漢沛南頓祖
逖復浚儀進屯封丘進號鎮西八月周訪卒王敦使從事中郎郭
舒監其軍欲因代之朝廷用湘州刺史甘卓而徵舒爲尚書右丞
敦留舒不遣九月敦表其參軍沈充代卓爲湘州帝弗許敦殺武
陵內史向碩徐龕降後趙十月蔡豹坐畏懦誅帝之初鎮江東敦
導兄弟外內夾輔後任刁協劉隗治尚刻覈多抑制貴寵導漸見
疏敦不平上書訟之詞語怨望帝素銜敦專至是益怒十二月以
左將軍譙王承爲湘州刺史陰與梁州刺史甘卓南北合勢控敦
上游

太興四年二月徐龕復請降四月後趙石虎陷厭次執幽州刺史段匹磾七月尚書戴淵丹楊尹劉隗出鎮合肥淮陰名爲討胡實備敦也御史中丞周嵩勸帝勿疏導帝納之遷導司空九月祖逖卒弟約代鎮十一月皇孫衍生十二月封慕容廆遼東公

永昌元年正月改元敦舉兵向闕以除劉隗刁協爲名帝大怒下詔討敦譙王承起義說甘卓卓勉從之敦攻承卓弗救二月封子

昱爲琅邪王

本紀作三月

詔徵戴淵劉隗入衛三月以導爲前鋒大都督

督淵等討敦右衛帥周筵率水軍討敦黨沈充于吳興劉隗軍金城右將軍周札守石頭帝親被甲徇師于郊詔甘卓領荊州陶侃領江州各率所統躡敦後敦至石頭札叛降敦奮威將軍侯禮死之敦據石頭王師攻之敗績敦縱兵大掠宮省奔散帝脫戎衣著朝服遣使謂敦曰公若不忘本朝于此息兵則天下尚可共安如

其不然請避賢路刁協走死劉隗奔後趙辛未大赦敦自爲丞相督中外錄尚書擁兵不朝殺戴淵周顛以西陽王羨爲太宰加導尚書令四月敦還武昌長沙陷譙王承死之五月敦殺甘卓七月後趙陷泰山執徐龕兖州刺史郗鑒自鄒山退屯合肥徵拜尚書徐充諸戎多降于後趙十月又陷襄城城父圍譙祖約退屯壽春遂失陳留十一月罷司徒笄丞相敦以司徒官屬爲留府帝幽憤成疾閏十一月十一日己丑崩于內殿年四十七太子紹卽位謚曰元廟號中宗陵曰建平

論曰太安中童謠云五馬浮渡江一馬化爲龍帝與西陽王羨汝南王祐南頓王宗彭城王雄同至建康帝竟嗣統史稱^玄石圖有牛繼馬後故宣帝深忌牛氏遂鳩其大將牛金而恭王妃夏侯氏竟通小吏牛欽是生元帝

魏志青龍三年裴注引魏氏春秋云是歲涌石負圖馬七麒麟在東鳳皇在南白虎在西犧牛在北搜神記云始見

于建安形成于黃初文備于太和漢晉春秋云馬十三牛一鳥一至晉初其文愈明三說所傳年歲形象物數皆不相符當敦逞逆時其欲埽除甚

矣未聞以此為口實然則斯言晚出烏可信乎

明帝

帝諱紹字道畿元帝長子也母荀氏燕代人位卑怨望為元帝所疏薄虞后實母養焉幼穎敏篤孝及長有文武材王敦甚憚之永昌元年閏十一月十二日庚寅即位尊荀氏為建安郡君二年二月葬元帝帝徒跣送葬自西階至于陵所

太寧元年三月改元敦諷朝廷徵己從之四月敦至姑孰屯于湖復置司徒官使導為之解導揚州刺史敦自領揚州牧加殊禮六月立皇后庾氏

諱文君潁川鄆陵人父探卒丞相軍諮祭酒以后兄亮為中書監七月詔拜郗鑒江西都督出鎮合肥敦表為尚書令從之後趙石虎陷青州殺曹嶷趙主劉曜自將滅陳安涼州張茂降于曜敦欲強其宗族以

史 太寧二年正月道士李脫妖術惑眾敦因誣周嵩周筵與脫謀反攻殺之又殺周札後趙將石瞻寇下邳彭城取東莞東海兗州刺史劉遐退保泗口石生寇汝潁石聰助之敗李矩郭默三月趙寇魏興南陽五月張茂卒子駿立敦疾甚矯詔拜其子應為武衛將軍殺帝常從督公乘雄并曾六月表其左司馬溫嶠為丹楊尹使覘伺朝廷嶠至以敦逆謀告帝帝將討敦訪光祿勳應詹詹贊之帝密乘巴滇駿馬微行至于湖周察敦營壘敦晝寢夢日環其城

驚起曰黃鬚鮮卑奴來邪帝狀類外家鬚黃故敦謂帝鮮卑即使五騎物色追帝帝馳去食逆旅與其嫗七寶鞭曰後騎來可以此相示馬遺糞以水沃之追騎至問嫗嫗曰去遠矣出鞭五騎傳觀

晉書卷之三十三
之又見馬冀冷遂止不追帝還都沒計討敦丁卯加司徒導大都督領揚州溫嶠督秦淮水北軍與卞敦守石頭應詹爲前鋒都督督水南軍郗鑒督從駕諸軍庾亮下壺並加軍號鑒請徵劉遐蘇峻入衛詔笄徵王邃祖約陶瞻帝出次中堂下詔偁敦已死錢鳳爲逆募誅鳳者五千戶侯諸文武爲敦所授用者一無所問敦所領將士單丁在軍者皆遣歸終身不調餘予假三年休訖還臺與宿衛同例三番敦見詔怒甚而病轉篤不能自將七月三日壬申王含錢鳳水陸五萬趣秦淮嶠以援師未集移前軍屯水北燒朱雀杭以摧其鋒含至不得渡軍于南岸帝方欲自將討賊聞杭燬大怒嶠鑒俱曰今宿衛單寡徵兵未至賊若豕突危及社稷柰何不能小忍之乎夜帝募壯士使段秀等渡水襲之四日平明戰于越城敦兵大敗斬其前鋒將何康敦在于湖聞敗憤惋而死帝使

說沈充于吳興許以司空充不從舉兵趣建康前宗正虞潭安東劉超宣城內史鍾雅等皆起義討充充率萬餘人會含十一日壘于陵口十八日劉遐蘇峻至精卒萬人帝夜勞之二十六日賊渡竹格渚攻臺城應詹等禦之不利賊至宣陽門拔柵將戰遐峻自南塘橫擊大破之遐又破充于青谿明日賊燒營夜遁明日帝還宮大赦唯敦黨不原八月命庾亮督峻追充溫嶠督遐追含鳳悉平之有司奏王彬等敦之親屬皆當除名詔曰司徒導大義滅親猶將百世宥之況彬等皆公近親乎悉無所問詔除敦參佐名嶠請貸其不從逆者陸玩等從之論功封導郡公嶠壺亮遐峻縣公鑒詹等縣侯餘封賞有差十月進導太保領司徒加殊禮導固辭不受詔應詹鎮武昌劉遐鎮淮陰蘇峻爲歷陽太守十二月沈充故將顧颺反伏誅

晉書本紀三
太寧三年二月復三族刑惟不及婦人贈諸死事者官赦敦黨後
趙使宇文部攻遼東慕容廆大破之遂入宇文國三月立子衍爲
皇太子大赦許昌叛降于後趙四月後趙石瞻殺兖州刺史檀斌
于鄒山五月以陶侃爲荆雍益深四州都督荊州刺史李矩郭默
軍數爲石生所敗又乏食乃遣使附趙趙應之軍潰矩默皆南奔
司豫徐兗之地大半入于後趙七月郗鑒以車騎將軍出鎮廣陵
都督兗青徐三州領兖州刺史卞壺代鑒爲尚書令詔滅國絕世
應興繼者北郊及四時五郊之禮名山大川應望秩者主者詳議
八月詔吳將相名賢之胄靜己守真不聞于時者中正以名聞右
衛將軍虞允元敬皇后之弟也與左衛將軍南頓王宗俱帝所親
任典禁兵在殿內羽翼多勇士王導庾亮忌之言于帝帝待之愈
厚使掌宮門管鑰帝寢疾亮夜有所表從宗求鑰宗弗與叱亮使

曰此汝家門戶耶亮益忿之帝疾篤不欲見人亮疑宗允及宗兄
太宰兼有異謀排闥入升御牀流涕言兼等圖廢大臣請黜之帝
不納閏八月十九日壬午帝大漸召兼導壺鑒亮嶠領軍陸曄並
受遺詔輔太子更入殿將兵直宿復拜壺右將軍亮中書令曄錄
尚書事二十四日丁亥詔曰自古有死聖賢所同壽夭窮達歸于
一槩亦何足特痛哉朕枕疾已久常慮忽然仰惟祖宗洪基不能
克終堂構大恥未雪百姓塗炭所以有慨爾不幸之日斂以時服
一遵先度務從儉約勞眾崇飾皆勿爲也衍以幼弱猥當大重實
賴忠賢訓而成之凡此公卿時之望也敬聽顧命同心斷金以謀
王室諸方岳征鎮刺史守將皆朕干城雖事有內外其致一也不
有行者誰捍牧圉譬若唇齒表裏相資窳勦力一心保祐沖幼永
令祖宗之靈寧于九天之上則朕殤于地下無憾黃泉明日崩于

晉書卷之三
東堂年二十七太子卽位謚曰明廟號肅祖陵曰武平

成帝

帝諱衍字世根生五年立爲太子而明帝崩太寧三年閏八月二十六日己丑卽位尊皇后庾氏爲皇太后九月太后臨朝稱制司徒王導錄尚書與中書令庾亮尚書令卞壺參輔朝政然事皆沒于亮奪南頓王宗虞允左右衛兵舊史云以宗爲驃騎將軍按明帝討王敦詔有驃騎領左衛耳若自左衛遷驃騎不得爲失職也遷允爲大宗正

咸和元年二月改元石生陷汝南六月劉遐卒以郗鑒兼領徐州刺史郭默爲淮北監軍遐將吏不樂屬默奉遐子肇作亂臨淮太守劉矯擊定之七月應詹卒初王導輔政以寬和得眾及亮用事任法裁物頗失眾心豫州祖約自以名輩不後郗卞而不預顧命遺詔褒進大臣又不及約疑亮刪之荆州陶侃亦以不預顧命爲憾歷陽蘇峻恃功驕恣亮旣疑峻約又畏侃得眾八月出溫嶠爲江州都督刺史鎮武昌拜王舒會稽內史修石頭城十月紹封曹勣爲陳留王明帝之志也自後紹封終晉世不絕立弟岳爲吳王南頓王宗失職怨望又素善蘇峻亮益惡欲除之宗亦欲廢執政御史中丞鍾雅劾宗謀反亮使右衛趙允收宗宗拒戰死貶其族爲馬氏免羨太尉降封弋陽縣王出虞允爲桂陽太守宗黨卞闡奔峻宗之誅也帝不知久之問亮曰常日白頭公何在亮對謀反誅帝泣曰舅言人作賊便殺之人言舅作賊當如何亮懼變色後趙石生寇鄆順陽太守魏該奔襄陽十一月改定王侯國秩九分食一石聰寇壽春祖約請救不應兵及阜陵逡遁京師大震加導大司馬假黃鉞都督中外諸軍以禦之軍未出蘇峻將韓晃擊走聰朝廷解嚴導解大司馬議作淝塘以遏胡寇約聞之曰是棄我

晉書卷之三
成帝
九

也十二月濟岷太守劉闡以下邳叛附後趙石瞻陷邾蘭陵是歲張駿聘于成

咸和二年正月庾亮欲徵蘇峻訪諸王導導及卞壺並止之壺又以書報溫嶠嶠馳書止亮亮皆不從峻聞之遣使詣亮請移鎮討賊亮不許召郭默爲後將軍領屯騎校尉任弟冰爲吳內史皆將兵以備峻十月下詔徵峻峻不奉詔十一月及祖約舉兵反尚書左丞孔坦司徒司馬陶回請及峻未至急據阜陵麻湖之險守江西當利諸口進兵臨之導以爲然亮不從十二月峻使韓晃張健渡江陷姑孰彭城王雄章武王休叛奔峻京師戒嚴以亮爲征討都督趙允爲歷陽太守與左將軍司馬流禦諸慈湖流敗死又遣鍾雅率舟師助允宣城內史桓彝起兵討峻至蕪湖敗還郗鑒請赴難亮不許鑒使廣陵相劉矩率師入援是月徙琅邪王昱爲會

稽王吳王岳爲琅邪王

咸和三年正月嶠救京師至尋陽陶侃遣督護龔登赴嶠受節度臺軍趙允鍾雅次慈湖二十八日丁未峻濟橫江登牛渚陶回請邀諸小丹楊亮弗聽二月庚戌朔峻至蔣陵臺軍亦自江路還卞壺督雅允及郭默軍與戰陵西敗績七日峻攻青谿縱火焚柵遂焚宣陽門入臺城丹楊尹羊曼黃門侍郎周導廬江太守陶瞻壺及二子珍盱並力戰死亮及三弟懌條翼趙允郭默皆奔尋陽導令侍中褚翊抱帝御太極殿自與光祿大夫陸曄荀崧尚書張闓升御牀擁帝右衛劉超及雅翊侍立太常孔愉朝服守宗廟百官皆奔散賊至欲上殿翊正色臨陛叱之曰蘇冠軍來覲至尊軍人豈得侵逼峻兵乃退轉掠後宮驅役百官裸剥士女哀號動地八日峻偁詔大赦惟亮兄弟不原自爲驃騎錄尚書以約爲侍中太

晉書本紀三
尉尚書令弋陽王叢詔峻峻復西陽封拜太宰錄尚書遣將攻吳
庾冰走會稽峻以待中蔡謨代之使尚書張闓權督東軍導密令
闓宣太后旨諭三吳起義亮至尋陽以太后詔進嶠官嶠號痛不
受而分兵給亮共推陶侃爲盟主三月太后以憂崩峻南屯于湖
四月後趙石聰陷南陽攻壽春五月峻遷帝于石頭命將東畧地
嶠等至蔡洲郗鑒及雍州刺史魏該皆以兵會桓彝復進屯涇縣
六月韓晃陷涇縣桓彝死之魏該卒于師侃用李根策築白石壘
亮率二千人守之又用孔坦策使郭默從鑒還屯京口立大業曲
阿虔亭三壘斷峻餉道約助峻襲淝口過皖攻桓宣嶠將毛寶救
之拔約合肥戍石聰攻壽春七月約眾潰奔歷陽峻遂失勢九月
導攜二子奔白石毛寶又燒峻句容湖孰積聚峻乏食急攻鑿壘
侃用殷羨策攻石頭以救之臨陳斬峻峻弟逸收餘眾保石頭是

歲七月後趙石虎攻趙河東八月趙主劉曜敗諸高候逐圍石生
于金墉十二月後趙主石勒自將救金墉禽曜以歸明年盡收趙

地

咸和四年正月陸曄及弟玩說匡術以臺城返正毛寶入守之劉
超鍾雅謀奉帝奔義軍爲逸所殺趙允破歷陽約奔後趙逸攻臺
城焚太極東堂祕閣皆盡寶力戰却之二月戰于檀浦斬峻子碩
逸潰走帝幸嶠舟誅弋陽王叢大赦命將追禽逸餘黨悉平于時
宮闕灰盡帝居建平園眾議遷都導不可乃止以褚爌尹丹楊爌
善撫綏眾然後定罷湘州以笄荊州三月論功侃進太尉加督交
廣寧嶠驃騎開府儀同三司皆封郡公鑒司空曄衛軍開府儀同
三司皆封縣公卞壺父子桓彝劉超鍾雅羊曼周導陶瞻皆加贈
謚有功諸將賜爵有差復遭賊郡縣三年租稅導欲官峻降將路

永匡術賈寧等嶠不可侃嶠請還藩朝議留嶠嶠固辭亮請罪弗許求一鎮自效以爲豫州都督刺史出鎮蕪湖湘州刺史卞敦不赴難侃奏收之導請宥之媿疾而卒四月溫嶠率軍司劉允代十二月郭默誣允反殺之傳首京師是歲蒲洪姚弋仲皆降于後趙咸和五年正月大赦梟允首以默爲江州陶侃庾亮請討默乃收允首五月誅默亮辭賞還鎮加侃江州都督刺史解交廣都督以授鄧岳侃移鎮武昌後趙將浮海寇南沙殺都尉六月初稅田畝三升九月石勒僭帝寇襄陽周撫棄城遁坐免張駿僭藩于後趙是月作新宮繕苑城十月帝幸導第置酒大會拜導及妻如家人禮自是數幸成將李壽陷巴東建平

咸和六年正月後趙將復浮海入寇郗鑒擊走之加鑒督吳國咸和七年正月大赦後趙將復浮海入寇七月復襄陽十月進侃大將軍十二月帝遷于新宮

咸和八年正月成將李壽陷朱提後趙來致幣詔焚之三月寧州叛附成五月慕容廆卒子皝立七月後趙主石勒死子宏立石虎擅政石聰以譙來附虎滅之十月石生以關中來附與其洛陽守將石朗共攻虎虎皆滅之遷關中民夷于關東使蒲洪鎮枋頭姚弋仲鎮灊頭十二月石生將郭權以秦州來附

咸和九年正月以郭權爲雍州刺史仇池楊毅來僭藩張駿使至二月加駿大將軍四月郭權爲石虎所滅六月陶侃卒以庾亮爲荆江豫益梁雍六州都督代鎮武昌成主李雄死子班立十月雄子期殺班而立十一月石虎殺其主宏自僭居攝趙天王十二月虎將朱縱以彭城來附虎攻取之縱來奔

咸康元年正月帝加元服改元四月後趙主石虎南游游騎數十

晉書卷之三
至歷陽太守袁耽表上之京師戒嚴已而審其非寇免耽官石遇寇襄陽桓宣拒却之九月後趙徙都鄴

咸康二年十月詔求周漢後以繼衛山陽之封鄧岳復夜郎興古加督寧州

咸康三年正月立太學十月慕容皝自僭燕王仇池楊初殺毅自立

咸康四年三月慕容皝及後趙滅遼西分其地四月成李壽殺其主期而立改國號曰漢後趙主石虎自將攻慕容皝圍棘城敗還六月罷司徒置丞相以寵王導八月分寧州置安州十一月代人立什翼犍爲王

咸康五年正月大赦三月鄧岳復寧州庾亮欲經畧中原表桓宣爲司州督河北鎮襄陽弟懌爲深州監雍梁鎮魏興翼爲南蠻校

尉領南郡鎮江陵自解豫州授毛寶監江西與西陽太守樊峻戍邾城旣而憚魏興險遠更命懌屯半洲而以武昌太守陳躡爲深州使趣漢中四月亮參軍李松禽成荊州刺史李閔巴郡太守黃植遂請移鎮石城以偪後趙帝下其議丞相導請許之太尉郗鑒太常蔡謨以爲不可朝廷是謨議下詔止亮七月王導卒何充爲護軍庾冰爲中書監揚州刺史並錄尚書八月罷丞相復司徒郗鑒有疾請蔡謨爲軍司鑒卒謨遂代鎮九月後趙將夔安等分道入寇陷沔南殺五將陷邾城寶峻赴江死降義陽圍石城竟陵太守李陽拒却之然猶掠漢東七千戶而去亮請自貶弗許後趙攻慕容皝凡城不克徙遼西民于薊南虛其地十二月以琅邪王岳爲司徒

咸康六年正月庾亮卒以何充爲中書令庾翼代亮鎮武昌二月

大赦十月慕容皝襲後趙過薊至武遂高陽

咸康七年正月皝築龍城二月詔封皝燕王四月實編戶王公以下皆正土斷白籍十二月罷安州

咸康八年正月大赦三月初以悼后配食武帝廟五月帝不豫二子丕奕皆在襁褓庾冰請以母弟琅邪王岳爲嗣許之何充力爭弗能得六月八日癸巳帝崩年二十二謚曰成廟號顯宗陵曰興平

論曰自古開業之君必親戎馬非獨才畧固優亦所以習攻取之勢知鋒鏑之危聯將士之情樹中外之望也反側已定威信已著其于功勞之臣疆場之將度才揣分如指在手然後得以安坐而屈伸之元帝初鎮江左逐周馥走裴憲斬華軼局面固以獨立矣杜弼本嚮義隔絕乃成變杜曾凶狡依託西臺帝果親駐武昌督

率翦撲權不旁落王敦焉能跋扈哉然後協和南北之士氣扶植上下之紀綱漸退門望以趣功實數年之後窳可言治明帝崎嶇飢凶志收魁柄親結將帥得其死力卒平大憝政自己出中興可爲灼然著矣向今天假之年使當劉石傾蕩之會驅羣策以營中原邠卞足以正朝章溫陶足以固藩翰蘇峻郭默之徒鷹搏犬噬亦足以折衝邊徼勳績豈可量哉不幸崩殂六尺在朝元舅雖忠篤制馭乖方遂使幼主屈辱母后摧隕洎乎石虎縱毒流溢八州關洛聽其屠膾徐豫供其蹂躪舊老之凋替將盡新造之創痍未復乃欲開疆闢土豈其時乎功廢身物固寥然已

晉書本紀三

天保二年

